



TONGTEP RATEP

A MONTHLY CHURCH BULLETIN OF DIMAPUR AO BAPTIST AROGO | DIMAPUR | VOL-IV | ISSUE-8 | 4 PAGES

Idu Mishmi Mission Field Osang

- Rev. K. Wati Jamir, Field Director

Tsüngrem temeim salem arogopur ajak dangi Idu Mishmi Field ajanga lemsateper.

Tanü wara tamajung ajanga alima ajunga nung tetsübu aser tasüba jendi adokdagi. Tsüngrem temeim ajanga tanü tashi field nung aser asen aliba district nung iba wara tamajung agi metongdaktsü-i lia arudagi. Tsüngrem tenung asanger.

Lokti tekülem sentep tenla kidang melitetaka, amangbapur ajak tanela jenjang meraksai kidang chirnurtemden tekulem mapang aonung shia aser Deobar Devotional sentep mapang kidang ka-a arudagi.

Lockdown mapang ya mapang tajung ta zungshir. Iba mapang kija kibong ajak Tsüngrem den tesendaktep akangshiiba mapang; pei tashi mait rajema angatetshiba mapang ta angateter. Mamangertemia Tsüngrem dak alaka meimchir tashi aser temetetba agi kecha mesütetsü aser makoktsü ta amanga aika tzüsena Khristan züngsemi arutsü sarasadema atadagi.

Yimtsüngtemi oa kija kibong den Tsüngrem O lemsatepba sarasadema mazüngi dang lidagi. Tsüngrem-i anema toktsüba yong ajak tongteta yaritepba arudagi. Maneni arogopur ajaki sarasadem nung yaritsü ayongzuker.

1. Chaima Pulu Evangelist mapa nungi anener

14th June, 2020 nü Chaima Pulu Evangelist mapa nungi anenba tatembang sentep Rokmu Arogo nung agiogo. 1992 nungi 2020 June ita tashi Evangelist mapa inyaker anener, ano maneni Rokmu Arogo nung sannükba mapa inyakdagi.



2. Tasüba :

Mr. Aladi Nina (20 Years, BA II Year) : Pa Dambuk Arogo nungi 19th August, 2020 nü mapang talangka Brain Tumor ajanga shiranga lia süogo. 21st August nü funeral agia liasü.



Mrs. Jeri Linggi : Dambuk Arogo nungisa la bike accident nung 26th August 2020 nü asü. Tebuba mamanger saka labo tamanger tajung ka asünung, August 26 – 27 asen Khristan nem tatmbang sendong agitsü mela-a 27th nung Khristan yimya nung tatembang funeral sendong agi. Iba sülen par sobaliba yimya amshia 29th August nü ali nung rema yutsü.

Tamanger tajung ana Dambuk arogo nungi pilaa oadokogo. Kanga dang sasa-a nilemer, saka Tsüngremi-a tajungtiba dang aginür. Pai agütsü aser Paisa bener ogo. Tasür kibongtem atema sarasadem nung maneni yariangma.

3. Nütsüng Terenlok : Tzüsenertem aika lockdown ajanga nokdanga lir. Mapang tajung alangzüktsü sarasadema ata. Tang tashi nung parnok 15 limapur kibong nungi tzüsenogo.



4. Social Work : Rokmu nung Self Reliance atema ali alia yutsüba nung sumomo (banana) tema lir. Idakji 15th August nung farm merükta liasü.

O Tembang :

Tashidak palala agi shirangertem aika lir. Lockdown mapang nungi tanü tashi parnok dangi tsüngtong oa sarasadema yaritepba arudagi. Itempurtem atema sarasadem nung yaridaktsüner.

Iba ocet nung shia aliba ajak asoshi Tsüngrem tenung sangdi. Maneni amangbapur ajaki sarasadem nung yaritsü ayongzuker.

Editorial

- Talimeren, Music Director, DABA

TIA TAMAJUNG SAKA YIMLADI

Tanü Alima Yimya (Nature) ajanga meimchir nem tangazüktsü tulu ka agütsüba asenoki ajangshir. COVID-19 WARA tamajung ka yagi asenok ajak alenbanga ayutsüsa, "YA KECHI!" ta asenoki aoksa bilemer aser kecha mesüteter. Aoksa dang alimato tila ka dang ta tali rajema angateta kümogo, kechiaser mapang tatsüka tsüngta nung wara ajanga alima ajak alenbangda-ktsüogo.

Alima tashi tawa ajak, sangrasangji ajak aser pei lima (Country) tashi tuluba ta toktepba ajak ajemalua kümdaktsüogo. Oda nisunger teimla ajak samatsüsa tia tamajung ka tanü aseni ajangshir. Iba lung, kobai asen takümalenbanger nembanga lir, ya shibaimeküptoktsü?

Mark 16:2-4, Yisu leper nung rema toktsür alidang Mari Magdalene, Yakob tetsü Mari aser Salome, parnok asem tsübuseta leper lagi Yisu mang nung totzü mezütsütsü aodang, Leper Lungji meküptoker angu – Teimla tuluba aküm. Halleluya! Meimchir tashi agi makokba lungji Tsüngremi meküptoktsüogo.

Ibri 10:23-24 nung zülua aliba, "...Asen teimla nangzükba marakzüdaktsü akang akanga asenoki ametdi, kechiyong shibai nangzükogo pa tsüngchir lir. Aser temeim aser mapa tajung dangi jangratsü asoshi, asenoki kati ka den shisadangtepdi."

Adianutem, tanü asen teimla samaa alidang Tsüngrem nungi teimlaji agutsü, aser aji Pa dak hendaka amangertem asoshi lir. mapang nung Tsüngremi Noah aser par kibong kümzükba ama, Pai nangzükba teti ochi nung lir. Asen taküm alenbanga aser nembanga aliba lungji Tsüngremi longdoktsütsü. Iba teimla nung asenok lidi. Amen.

PLAIN KARBI MISSION FIELD OSANG

- P. Toshi Aier, Field Director

Tamasa Yisu Khrista temeim salem tulu amangbapurtem ajak tangi Plain Karbi DABA Mission Field nungi abener. Asenok ajaki metet taküm küm tensa majungba agi sarasadema yangluba sentongtem aser teinyaktsü aliba wadang aika meinyakteti arudagi. Nenok sarasadem ajanga Tsüngremer taochi nung alima lockdown masü dang inyakba aser ano tensa teyalong nung wadang inyakba osang tatsü agi lemsateper.

1. Nütsüng Renlokba

Tang tashi nung parnok tenet (7) tzüsenogo. February ita 19th nü Rongtera nungi Hindu nunger kibong ka nung par asem (3) Pokaigaon arogo nung tzüsentsü. August 23rd nü Kapitoli nungi hindu tsür asem aser tamanger Kibong nungi ka tzüsentsu.

2. Sentongtem Agiba

*Tanurtem atema sentong

January 10th - 12th Kalapani nungi arogo asem (Kalapani, Rongtheang aser Klengbeygaon) tanurtem sentong ka agi aser iba mapang nung tamanger aser mamanger ajak agi parnok neter pezü (74) aten.



Iba sentong nung saisapong, kerten menü den Tsüngrem O agi ajongshia tanurtem Tatener ajak kanga tang jangratema monger senshi. Sentong nung yaritepertem Pokaigaon nungi nisung tenet (7).



* Küm Tatem Mungdang

March 5th - 8th Plain Karbi DABA Mission Field nungi arogotem ajak longjemer "Nenok Alima Tangi Kü Kulitem" onük nung ajemeter kum tatem mongdang among. Iba sentong nung O jembirtem Mr. Yohan Longkümer, Exec. Secy, NDBA aser Janetpur Teron, Evangelist PKDMF tena liasü.

Iba mapang sentep pongu ben agi aser tanungba sentong pongu tashi nung kerten menü balala tetoktepba agia liasü. Mongdang tesenteper ajak agi 455 liasü.



* Sannüker Tasen Shimba

Kapitoli arogo nung Mr. Luku Meins sannüker mapa inyaka liasü saka temang nung timtem aliba ajanga meinyaktettsusa aküm nung pa melena March 23rd nü Mr. Thomas Ekka sannükba mapa inyaktsü nungloktsüogo.



3. Yim & Fellowship Tasen

Taoba küm 2019 DABAi Langvothung Arogopurtem atema lenten len alua ali begha pezü (4 bighas) alitsüba, iba tesemi April 2nd 2020 nü bushia aluogo aser iba yim tasen Thertolangso ta tenung jaa kümtetogo. Anungi joko idaki aliba arogopur dang tang nungi Thertolangso Baptist Fellowship ta ajatsü.



4. Tasüba Atalokba

Pokaigaon nung Lt. Moneswar Milik, PKMF nung mezüng tamangertem rongnung tambusang. Kapitoli nung Adivasi tsür ka Lt. Soitie Urang.

5. Relief Agütsüba

May ita tatemlen arogo pezü Pokaigaon, Ahutoli, rongtera aser Kapitoli nung kanga timtemertem repranger kibong lir (40) nem teyari agütsü aser parnok rongnung Hindu nungera kibong tenet (7) tashi tensema liasü.



Ano July ita tetenük (i.e. 4th & 5th) arogo pongu (5) Kalapani, Klengbeygaon, Rongtheang, Topisang aser

Thertolangso nung kibong tenem (50) nem teyari agütsü aser parnok rongnunga hindu nunger kibong pongu (5) tensema liasü. Ajak nem jangonütsü ten aonsotsü agütsü. Iba osang zuluba Tashi nung ajak agi kibong tekor (90) nem teyari agutsuogo.

6. Mapai Teyari Aoba

Taküm Rongtera nung hindu nunger kibong ka tzüsentsüba sülen tamanger kibongtem reshikangshitsü tenzük. Iba mapang alu nunga metsü meyokdakstsüba sentong yanglua liasü. Joko tzülu atemtsü mapang süir saka meinyakteter ta aliba osang angashia nashi jora asem (3 pairs) anünü atema bushir yok aser 28th July nü Pokaigaon nungi mapa nung teyakyak parnok 12 anir oa mo apongtsü aser 30th July nü arogo asem nungi nübu yamai Ahutoli nungi 13, Pokaigaon nungi 35 aser Kapitoli nungi 9 ajak agi nübu 57 oa mo tema yutsü. Ibai adianu Mr. Rajen Tissoer tzülu, ibaji ngua Hindu nunger karibo temulung süa reprang saka karbo kanga ain atoka asaperanga liasü.



7. Self-Reliance Mpa

Peii inyakteta agitsü aser amshitsü atema mapang mapang nung inyakba kar yamai; teburtem atema süng aser yongsen mapa angazüka inyaktsü ajungshir aser ano itemji sayur. Ano tetsürtem atema olaangla mapa inyaktsü ajungshir aser nüngdakba osettsüsettem (Handloom tools) yanglua agütsür.

O Tembang

Alima tensa majung Tsüngremer lu nung metsü peroktsü lemang kanga tang mesüa liaka aser ano arogotem sema aotsü lemang mesatemaka arogopurtem ajaki tamang agi sarasademtsüba ajanga Tsüngrem nungi taochi ngua asen aolen ajak nung len ania arudagi. Yamaji tensa agi senzusenpongtsu mesademakasa mapang shia arogotem sema aor aser iba mapang nung limapurtem dang osang tajung ashitsü mapang tajung ngua inyaka arudagi. Aji oda anema lia taküm tajung nung inyaktetbaji aser ano aodang arudang ajak nung kecha asen asoshi tenokdangba aser timtem kecha majurui senzusenpongtsu nenok tamang sarasadem ajanga ta kangasa pelar aser Tsüngrem tenung asanger. Arogopurtem tamang sarasadem meteni ang kecha takok ngua meinyaktet nung oda ania mekümi ano maneni sarasadem nung yaridaktsüner. Ajak takoksangi nenok taküm aser kibong ano tali moajangma.

Youth Ministry Osang

- Jongshimanen, Youth Director

1. 7th March 2020, International Women's Day anogo nung tetsür asoshi "Self-defence Workshop" sentong agi. Ano theme "I am Generation Equality" nung ajemdaker kipok sema liasü.
2. April 5th – 12th Passion week mapang Youth Evangelist ajanga Lai tekongtem onük den apet tesayuba Whatsapp Fellowship group ajanga hopta peyong sarasadem agia liasü.
3. 12th April, Easter Sunday anepdang timtemer kibong kar, Home Quarantine amongertem, aser Anugrah Nagamese Baptist church Signal nung züngsem kibong sümer (30) nem entsü set kaka agutsüa semdang liasü.
4. 5th June - World Environment Day tenüng nung Tenla Ki aser Community Hall meküta süngdong atem aser pei sasa züsenteta achitsü lanur ajaki mulongteta sarasadema "Kitchen Garden" inyakba nung shilem agia liasü. (Photo from Duncan)
5. Social Media ajanga lanurtem literary ministry - photography, Bible recitation aser Kijai Atenba ken nung toktepa liasü.
6. Mothers' Day aser Fathers' Day tenung nung Fellowship nung tantsüila aser tambusang semdang; social media ajanga tetushi ken tentsü; tenzüklatem parnok 12 semdanga laishiba kaka agutsü; Father's Day anogo nung obalatem kum 80 tema alir parnok 20 semdanga chiyongtsü kar agitsü.
7. 6th July – 31st July 2020, timtemer mesura shiranga mozü alii moluteterem, lanurtemi nubu angati tenla agüja mozü alii otsüa oda nungdakbapurtem den yaritepa liasü.
8. 28th April 2020, Lockdown ajanga timtema alir lanur parnok 14 nem jang aser entsü (egg) agüja semdang.
9. ABAM Youth Sunday anogo nung lanurtemi 'Covid-Care Centre' Signal Angami Village semdang aser teyari Rs. 5000/- only agütsü.
10. COVID-19 Pandemic mapang Contextual Ministry DABA arla kübok aliba lanur unemployed / aser lanurtem source of income lenmang kecha maliba ajanga timtemerem semdanga relief (cash) aser sarasadem agüja ministry inyakogo.
11. August ita nungi tenzüka Lanur tekülem sentep Online Live Streaming süa külema arudaki.
12. August ita Youth Evangelist-tem Workshop anaben tashi Zoom ajanga agiogo aser 24/7 Counselling tenzüktsü sarasadema renemdaki.
13. 6th September 2020, anogo nung Online ajanga Yinsem Fellowship nung Youth Revival agi. Merali aser Duncan Fellowship nung Bible study agi; aser Town Fellowship nung Literary week among.
14. "Made in DABA – 5" 15th, 16th & 17th September 2020, anogo nung Online social media (Facebook aser Instagram) ajanga order süa ayoktsü aser 19th September 2020 nü Free Delivery asütsü sentong renema lir.

Tenzüker Arogopuri Pela Agizüker

Mr. Jongshimanen,

M.Th, Christian Ministry (Counselling),
United Theological College, Bangalore,
nung study temer tanaben
Youth Director mapa nung
15th July 2020 nungi tenzüka inyakdaki.

